



ETF INSTRUMEN PELABURAN BAHARU

» Dana dijangka jadi pilihan pelabur dalam tempoh 5 tahun, beri pulangan lebih stabil

Oleh Shahrizan Salian

shahrizan_salian@bh.com.my

Dana Diniagakan di Bursa (ETF) dijangka menjadi instrumen pelaburan baharu pilihan pelabur dalam tempoh lima tahun akan datang berikutan keupayaannya memberi pulangan yang lebih stabil.

Ketua Pegawai Eksekutif i-VCAP Management Sdn Bhd, Mahdzir Othman (**gambar**), berkata ETF adalah instrumen pelaburan yang bersesuaian untuk pelabur jangka sederhana hingga panjang yang mahukan pulangan yang baik.

ETF, katanya, walaupun ia diperkenalkan pada tahun 2005, namun begitu masih dianggap

sebagai antara instrumen pelaburan baharu di Malaysia dan tahap kesedaran pelabur mengenai kemampuannya adalah rendah.

Pilihan lebih baik

"Pelabur mengharapkan lebih banyak produk ETF dapat diperkenalkan dalam pasaran supaya mereka mempunyai pilihan lebih baik dalam membuat keputusan pelaburan," katanya dalam satu temu bual bersama *BH* di Kuala Lumpur, baru-baru ini.

i-VCAP Management adalah penyedia perkhidmatan pengurusan pelaburan patuh Syariah tunggal tempatan yang dimiliki secara bersama oleh Khazanah Nasional Bhd, Kumpulan Wang Persaraan Diperbadankan (KWAP) serta Permodalan Nasional Bhd (PNB). **Bisnes B2**

Risiko pasaran sama, yuran lebih rendah

❶ Dari Bisnes 1

Mahdzir berkata, pasaran ETF di negara ini dijangka melakar perubahan dengan beberapa dana baharu bakal dilancarkan pada tahun ini dan tahun 2015.

"Dengan minat dalam hartanah dan beberapa instrumen pelaburan lain semakin perlahan, ETF menyediakan alternatif yang sangat berdaya maju kepada pelabur runcit dan institusi," katanya.

Jejak prestasi indeks

ETF ialah dana pelaburan terbuka diniagakan di bursa yang menjejaki prestasi indeks khusus dengan mengumpulkan sebilangan ekuiti di dalamnya bagi membolehkan pelabur mendapat pendedahan kepada pelbagai syarikat.

Instrumen pelaburan itu mempunyai risiko pasaran sama seperti saham atau unit dana amanah, namun mengenakan yuran lebih rendah kerana

diuruskan secara pasif.

Pelabur tidak akan dikenakan caj jualan atau caj keluar ketika melaksanakan urusan niaga ETF, kecuali caj dagangan biasa.

Buat masa ini, terdapat lima ETF yang disenaraikan di bursa tempatan.

ETF pertama diapungkan di Bursa Malaysia ialah ABF Malaysia Bond Index Fund pada Julai 2005.

Ia diuruskan oleh AmInvestment Bank dan satu-satunya ETF bon di rantau

ini dengan menjejaki pergerakan bon Kerajaan Malaysia.

ETF ekuiti pertama pula ialah FTSE Bursa Malaysia KLCI, atau dulunya dikenali sebagai FBM30etf yang menjejaki 30 saham terbesar dari segi permodalan pasaran di Bursa Malaysia.

Dana itu, yang dilancarkan pada Julai 2007 juga diuruskan oleh AmInvestment Bank.

Pada 2008, i-VCAP Management yang dimiliki bersama Khazanah Nasional Bhd, Kumpulan Wang Persaraan Diperbadankan (KWAP) dan Permodalan Nasional Bhd (PNB) melancarkan ETF patuh Syariah pertama menerusi MyETF Dow Jones Islamic Market Malaysia Titans 25, merangkumi 25 saham mewah kaunter patuh Syariah.

Bulan lalu, i-VCAP Management memperkenalkan MyETF MSCI Malaysia Islamic Dividend yang disenaraikan di Bursa Malaysia, Jumaat lalu.

INFO

❶ ETF ekuiti pertama pula ialah FTSE Bursa Malaysia KLCI, atau dulunya dikenali sebagai **FBM30etf yang menjejaki 30 saham terbesar** dari segi permodalan pasaran di Bursa Malaysia.